

Ehundaka iheslari kubatar atxilotu dituzte jada EEBBetako kostazainek

Kubako hegoaldea kontzentrazio gune bihurtu nahi izatea egotzi dio Habanak Clintoni

Estatu Batuetako Gobernuak iheslari kubatarrek atxilotu eta Guantanamo eraman zizuten iragarri eta berehala hasi da agindutakoa betetzen. EEBBetan sartzeko asmoa zuten ehundaka kubatar atxilotu zituzten herenegun bertan. Hala ere, Kubatik pilaka ari dira iheslariak itsasoratzen.

JONE LARRAÑAGA / DONOSTIA

Iheslari kubatarrek Guantanamo bidean jarriko zituztela iragarri orduko hasi ziren EEBBetako kostazainek errefuxiatuak atxilotzen. Clintonen prentsaurrekoa eman zuenetik goizaldeko ordu bata bitartean 400 lagunetik goiti atxilotu zituzten. «Iritsi ahala autobusetan sartuko ditugu Kromekeko zentrora bidean», jakinarazi zuen Lamar Wooleu Inmigrazio Zerbitzueta-ko zuzendariak handik Guantanamo basera itzuliko zituztela gogorarazi aurretik.

Hala ere, berriz ere Kubara itzuli beharrik ez ditu, antza, iheslariak izutu. Atzo goizaldera pilaka irten ziren *balse*-ak Floridako itsastartea zeharkatu nahian. Kubako irratiek Washingtongo Gobernuaren erabakia zabaldu zuten arren, ez zuten EEBBetara iritsita atxilotuko zituztela sinetsi, eta hala gertatuta ere «Guantanamo hemen baino hobeto» egongo direla azaldu zuten askok.

Egun EEBBek Kuban duten base militarrean 15.000 haitiar



Errefuxiatuak Kromekeko zentrora eramaten dituzte autobusean, handik Guantanamo bidean jartzeko. REUTER

daude, 1991ko estatu kolpearen ondoren ihes egindako errefuxiatuak guztiak. Eta Guantanamo lepo egingo du, itsasoan jasotzen dituzten kubatar guztiak hara eramaten badituzte.

Floridako komunitate kubatarrek gogor salatu du Etxe Zuriak hartutako erabakia, eta errefuxiatu kubatarrek haitiarren tratua bera jasotzea onartezina dela azpimarratu. 1967az geroztik EEBBetan indarrean dagoen lege baten arabera, Kubatik ihes egindako errefuxiatuek Floridako kostara iritsi orduko jasotzen zuten babes politikoa.

Errefuxiatu kubatarrentzat, ordea, gauzak aldatzen hasiak

dira. Gainera, atzo posible ikusten zen errefuxiatu oldea eragozteko Clintonen neurri gehiago agintzea. Iturri ofizialek jakinarazi zuten, berehala indarrean jartzeko lau neurri agintzekoak zituen Clintonen, besteak beste, EEBBetan bizi diren kubatarrek irlan bizi diren senitartekoei bidali ahal dieten dirua erdira murriztea.

«KONTZENTRAZIO GUNEA KUBAN»

Janet Reno Estatu Batuetako fiskal nagusiak baztertu egin zituen Floridako kubatarrek egindako kritikak, indarrean dagoen legea hautsi eta kubatarrek zi-

gortzeko asmorik ez dutela arrazoituta. EEBBen helburua, «Castro ihesbide gisa indarrean jarri duen taktikari» aurre egitea dela gaineratu zuen.

Baina Washingtondik egindako adierazpenak eta agindutako erabakiak ez dira Habanako agintarien erantzunik gabe geratu. Atzerri Ministerioak Kubako hegoaldea (bertan dago Guantanamo) kontzentrazio gune bihurtu nahi izatea egotzi zion Clintoni atzo egindako adierazpenetan. Roberto Robaina Kubako Atzerri ministroak arazoa politikoa dela argudiatu zuen, eta ez inmigrazioari lotutakoa bakarrik.

Muga itxi arren, orduko 800 ruandar baino gehiago ari dira Zaire aldera ihes egiten

GOMA

Zaireko Gobernuak itxi egin zuen atzo Ruandarekin duen muga, soldadu frantziarrak bertatik irten ondoren berriz ere errefuxiatuak pilaka Zairera igaroko diren beldur. Gaur gauean erretiratuko dira osotara Ruandatik soldadu frantziarrak, eta Nazio Batuetako babes indarretako 5.000 kasko urdinek hartuko dute frantziarrek utzitako lekua.

Baina Ruandako hego-mendebaldeko segurtasun gunean frantziarren babesean egon diren ruandar hutuak ez dira fio. Tutsien kontrolpean dago orain Gobernuak, eta hutuen aurkako mendekua hartuko dutela pen-

tsatzen dute.

«Ikuspuntu humanitariotik begiratuta tamalgarria da Zaireko Gobernuaren erabakia», azaldu zuen Ray Wilkinson Nazio Batuetako Errefuxiatuentzako Komisariatu Nagusiko (UNHCR) ordezkariak. Hala ere, ruandarrek hobe dutela segurtasun eremuan geratzea azpimarratu zuen, han segurtasun baldintzak hobeak direla argudiatuta.

UNHCR eta gainontzeko erakunde humanitarioak arduratuta daude, soldadu frantziarren irteerak Goman joan den uztailaren gertatutako sarraskia (milioi bat lagun errefuxiatu zen bertan ordu gutxitan) berriro gerta litekeela-koan.

Wilkinsonek atzo jakinarazi zuenez, herenegun bertan «gutxienez 20.000 lagunek» utzi zuten Ruandako segurtasun eremua Zairera bidean. Eta atzo mugak ixteko agindua eman zuten arren, ruandarrek pilaka egin zuten ihes Zairerantz.

Mugarik Gabeko Medikuek atzo jakinarazi zuten, orduko 800 lagunek baino gehiagok gurtzatu zuten muga. Bukavuko errefuxiatu gunean 25.000 errefuxiatutik goiti zenbatu zituzten atzo.

TELEBISTA KAMERAK URRUTI

Talde humanitarioen ahaleginak handiak diren arren, Zairen ez daude beharrezko azpiegiturak, eta hondamendia

gerta liteke berriz ere errefuxiatu oldea handitzen bada. «Gomako errefuxiatu gunean egoera dramatiko da oraindik ere; egunero 500 lagun hiltzen dira disenteriz, gosez eta bestelako gaitzez, baina oraingo honetan telebista kameretatik urruti gertatzen da guztia», salatu zuten atzo prentsa oharrean Mugarik Gabeko Medikuek.

Erakunde horrek, eta lan humanitarioetan ari diren gainontzekoek ere gogor kritikatu dute NBEko Segurtasun Kontseiluaren jarrera, soldadu frantziarrek denbora batean egoera arindu duten arren, oinarrian krisiak gori-gorian jarraitzen baitu Ruandan. Eta horren aurka ez dute ezer egin.

LABURREAN

BAKE plana ez dutela onartuko berretsi du Karadzicek

Bosniako serbiarrek ez dutela kontaktu taldeak proposatutako bake egitasmoa onartuko berretsi zuen herenegun Radovan Karadzic Bosniako serbiarren buruzagiak. Ostegunean bertan, Belgradeko Gobernuak berriz ere gogor ohartarazi zituen Bosniako serbiarrek «konkistako gerran» ari direla egotzita.

PALESTINARRAK hauteskundeak prestatzen

Gaza eta Zisjordanian hauteskundeak antolatzeaz arduratzen ari den batzordeak, palestinarrek eta israeldarrek osatutakoa, prest dauka bozketei buruzko dokumentua. Kairon herenegun iragarri zuten, hauteskunde prozesua prestatu beharko duten 5.000 lagun formazioa hasi da jada.

KING jipoitu zuten polizien aurkako zigorra handitu egin dute

Los Angelesko (Estatu Batuk) Apelazio Epaitegiak Rodney King gazte beltza jipoitu zuten lau polizien aurkako zigorra handitzea erabaki zuen herenegun. Bertako hiru epaileek aho batez iritzi diote poliziei ez zitzaizela merezi zuten zigorra ezarri. Lau poliziak kargurik gabe aske utzi zituzten 1992 urtean egindako epaiketan. Erabaki hark Los Angelesen inoiz izan diren liskarrik gogorrenak eragin zituen.

SOMALIako misioa murriztu egin nahi du Galik

Butros Gali Nazio Batuetako idazkari nagusiak egun Somaliaren dauden kasko urdinen kopurua gutxitzea proposatu du. Momentu honetan 18.700 soldadu daude, eta 15.000ra murriztu nahi ditu Galik. Horrezaz gain, Somaliaren elkarren aurka diren indarrek adiskidetzeko nazionalen aurrera egiten ez badute, Segurtasun Kontseiluak misioak han jarraitu behar duenentz erabaki beharko duela ohartarazi du.